



Nuuk 30. oktober 2018

UKA2018/106

Jens Napãtôk, Partii Naleraq

Angajoqqaat sulinnigiffeqartarnerat pillugu malittarisassani atuuttut allanngortinnissaannut siunnersuusioqqullugit Naalakkersuisut peqquneqarnissaanik Inatsisartut aalajangiiffisassaattut siunnersuut, taamaasilluni sulinnigiffeqartarneq sapaatip akunnerinik sisamanik sivitsorneqartussanngorlugu. Allanguut atuutilissaaq ulloq 1. juuli 2019 aallarnerfigalugu.

(Inatsisartunut ilaasortaq Randi Vestergaard Evaldsen, Demokraatit)

Inatsisartunut ilaasortaq Randi Vestergaard Evaldsen Demokraatit, Inatsisartut aalajangiiffisassaattut siunnersuummut saqqummissarnut Partii Naleqqamiit qujarusuppugut.

Partii Naleqqamiit pingaartilluinnakkatta ilagilluinnarpaat pilersissallugit nunatta inuisa toqqissisimasumik inuuneqarnissaat periarfissaqarnissaallu.

Pingaartitarilluinnarpparput pilersikkusullutigit ilaqutariit nukittuut meeqqaminnut periarfissiilluartut.

Taamaammat siunnersuuteqartup siunnersuutaa, angajoqqaat meerartaarnermi sulinnigiffeqartarnerat sapaatip akunnerinik sisamanik sivitsorneqarnissaanik siunnersuut ima oqaaseqarfigerusupparput.

Meeqqap pisinnaatitaaffigisariaqarpaa sivisunerpaamik inunngornerminiit toqqissilluni angajoqqaaminiinnissaa, taamatullu aamma angajoqqaat sivisunerpaamik meeraq najornissaa sivisunerpaamik ukiup siulliup iluani periarfissaqartariaqarlunnartoq.

Ilisimatuussutsikkut uppersarsarneqartareerpoq aammalu inuiaqatigiinni peqataasugut tamatta nalunngereerparput inuunermi pingaaruteqarlunnartuusooq meeqqat inuunermi aallartilluarnissaa pingaaruteqaannarani inuunerup sinneranut aamma pitsaasumik ingerlaqinneranut pingaaruteqarlunnartartoq inuunermi aallartilluarneq pigaanni.

Taamaammat meeqqap pisinnaatitaaffigisariaqarpaa ukioq siulleq angajoqqaaminiinnissaa piaartumik anguniarneqarnissaa.

Meeqqat mannakkut assigiinngitsumik pineqartarnerat akueriuminaatilluinnarparput Partii Naleqqamiit, ilumoorsinnaanngilarmi piniartut meeraasa aammalu isertitat peqqutaallutik meerartaartut ilaasa ilaannakortumik annikinnerungaartumik pisartagaqartinneqartarnerat.

Meeraq meeraavoq tamarmillu naligiinnerusumik pisartaqartinneqartariaqarlunnarput.

Taamaammat angajoqqaat sulinnigiffeqartarnerat pillugu malittarisassani atuuttut allanngortinnissaanut siunnersuusioqqullugit Naalakkersuisut peqquneqarnissaat tamakiisumik Partii Naleqqamiit tapersorsoratiq oqaatigissavarput.



partii naleraq

Taamatullu sivisunerusumik aammalu ukioq ilivitsoq angullugu Angajoqqaat sulingiffeqarlutik isertitaat apeqqutaatinnagit pisartaqalersinnaanissaat sulissutigineqartariaqartoq Partii Naleqqamiit isumaqarput, taamatullu oqaaseqarluta ataatsimiititaliamut susassaqartumut innersuullutigu.